

## Ionad Nua i gCorcaigh

**Ceist 1** Beidh tú ag féachaint ar ball ar thuirisc faoi ionad nua a d'oscail inné. Sula bhféachann tú ar an tuairisc pléigh brí na bhfocal seo leis an duine in aice leat. Tabhair buille faoi thuairim mura bhfuil sibh cinnte:

Trádáil  
Fiontar  
Fostaíocht  
Spáseolaíocht  
Réadlann  
Taighde  
Idirghníomaíocht  
Feachtas  
Teachtaireacht  
Spás-árthach

Iarr ar an teagascóir cuidiú libh focal ar bith nach bhfuil ar eolas agaibh a fháil.

**Ceist 2** Pléigh na ceisteanna seo leis an duine in aice leat nó le do ghrúpa:

An bhfuil suim agat san eolaíocht go ginearálta?  
An bhfuil suim agat sa spáseolaíocht?  
Dá mbeadh go leor airgid agat an rachfá ar thuras go dtí an ghealach?

**Ceist 3** Anois féach ar an tuairisc agus déan iarracht freagraí na gceisteanna seo a aimsiú. Ansin pléigh na freagraí leis an duine in aice leat.

1. Cad iad an dá dhream atá taobh thiar den togra?
2. Cá bhfuil an t-ionad seo?
3. Cad atá le rá ag na daoine áirithe seo?

Diarmaid Mac Mathúna  
Patricia Ní Éigeartaigh  
Mícheál Martin

4. Cén t-eolas atá sa mhír faoin spás-árthach *Discovery*?

**Ceist 4** Sa chaint deirtear '*ana-thábhachtach*' go minic ach cad a scríobhtar i gcónaí?

Déan plé leis an duine in aice leat faoi na rialacha a bhaineann leis seo. Cuir **an-** roimh na focail seo:

maith

sásta  
oiriúnach  
te  
gnóthach  
fada  
olc  
dathúil

**Ceist 5** ‘...*ar bord* an athraigh faoi láthair tá. . .’

Ach bíonn séimhiú tar éis *ar* de ghnáth (ar Phól, ar bhord). Cén fáth nach bhfuil séimhiú *ar bord* sa chás seo? Mura bhfuil tú cinnte cabhróidh an teagascóir leat.

Anois déan féin agus an duine in aice leat iarracht na cinn seo a dhéanamh:

1. ar (cathaoir) \_\_\_\_\_
2. ar (bís) \_\_\_\_\_
3. ar (mire) \_\_\_\_\_
4. ar (mála) \_\_\_\_\_
5. ar (meisce) \_\_\_\_\_
6. ar (Siobhán) \_\_\_\_\_
7. ar (cíos) \_\_\_\_\_
8. ar (siúl) \_\_\_\_\_

## Treoracha agus Freagraí

### Ceist 1

Trádáil	Trade
Fiontar	Enterprise
Fostaíocht	employment
Spáseolaíocht	Astronomy
Réadlann	Observatory
Taighde	Research
Idirghníomaíocht	Interactive
Feachtas	Campaign
Teachtaireacht	Message
Spás-árthach	Space ship

### Ceist 2

Tá an plé seo le déanamh sula seinntear an tuairisc.

### Ceist 3

1. An Institiúid Theicneolaíochta Chorcaí agus Comhairle na Cathrach
2. I gcaisleán ársa na Carraige Duibhe, Corcaigh
3. **Diarmaid Mac Mathúna:** Níl aon áit cosúil leis seo in Éirinn faoi láthair, is ionad den scoth atá ann agus an rud an-speisialta faoin áit ná go bhfuil taighde ar bun anseo agus go bhfuil saghas 'out reach activities' ar bun freisin.  
**Patricia Ní Éigeartaigh:** Ansin laistiar díom tá ríomhaire agus is féidir leat réalt a roghnú agus teachtaireacht a scríobh agus a sheoladh leis an radaiteileascóp go spás, go dtí an réalt a roghnaíonn tú, tá sé ar fheabhas.  
**Micheál Martin:** Ní raibh a fhios agam go dtí gur tháinig mé ar maidin cé chomh nua-aimseartha is atá gach rud anseo agus an taighde atá ana-thábhachtach agus is é ionad taighde chomh maith é agus tá an Institiúid Theicneolaíochta i gCorcaigh páirteach anseo agus tá siad freagrach as bainistíocht an Ionaid.
4. Le linn na hoscailte inniu chomh maith taispeánadh pictiúr ón spás-stáisiún idirnáisiúnta i Meiriceá Thuaidh agus don spás-árthach *Discovery*, ar bord an árthaigh faoi láthair tá Dan Tanney, fear atá pósta le Jan Egan a saolaíodh agus tógadh i ngiorracht scread asail don gcaisleán ina bhfuil an t-ionad anois lonnaithe.

### Ceist 4

'An-tábhachtach' a scríobhtar i gcónaí.

1. An- a bhíonn ann i gcónaí le fleiscín.
2. Cuirtear séimhiú ar chonsan ach amháin nuair a bhíonn na *dentals* i gceist – ní chuirtear séimhiú ar d,t,l,s,n i ndiaidh d,t,l,s,n.
3. Ní bhíonn arthrú ar bith ar ghuta.

An-mhaith  
An-sásta  
An-oiriúnach  
An-te  
An-ghnóthach

An-fhada  
An-olc  
An-dathúil

### Ceist 5

Leanann séimhiú an réamhfhocail *ar* más ionad cinnte atá i gceist i.e: ar **bhord**, ar **chathaoir**, ar **Sheán**. Ní bhíonn séimhiú ann más staid, suíomh nó am atá i gceist i.e: ar ball, ar maidin, ar muir, ar tír, ar meisce

ar chathaoir  
ar bís  
ar mire  
ar mhála  
ar meisce  
ar Shiobhán  
ar cíós  
ar siúl\*

\*ar siúl (más *on a walk/away* atá i gceist bíonn séimhiú ann i.e. tá Seán imithe *ar shiúl* ach más *happening, on* atá i gceist ní bhíonn séimhiú ann i.e. tá clár maith *ar siúl* anocht).

### **Eimear Ní Chonaola**

D'oscail an tAire Trádála, Fiontair agus Fostaíochta, Mícheál Martin an chéad ionad spáseolaíochta agus réadlann i gCorcaigh inniu agus tá áiseanna taighde, taispeántais agus idirghníomhaíochta ar fáil ann. Chosain an t-ionad nua seacht ponc cúig milliún euro agus is iad Institiúid Theicneolaíochta Chorcaí agus Comhairle na Cathrach atá taobh thiar den togra. Seo é Barraí Mescall.

### **Barraí Mescall**

Is i gcaisleán ársa na Carraige Duibhe atá an t-ionad spáseolaíochta nua lonnaithe, úsáid bhreá mar chuid den bhfeachtas atá ar siúl le cúpla bliain anuas ag an rialtas chun daoine a mhealladh go hábhair eolaíochta.

### **Diarmaid Mac Mathúna**

Níl aon áit cosúil leis seo in Éirinn faoi láthair, is ionad den scoth atá ann agus an rud an-speisialta faoin áit ná go bhfuil taighde ar bun anseo agus go bhfuil saghas 'out reach activities' ar bun freisin.

### **Patricia Ní Éigeartaigh**

Ansin laistiar díom tá ríomhaire agus is féidir leat réalt a roghnú agus teachtaireacht a scríobh agus a sheoladh\* leis an radaiteileascóp go spás, go dtí an réalt a roghnaíonn tú, tá sé ar fheabhas.

### **Barraí Mescall**

Tar éis don Aire Martin teachtaireacht a sheoladh go réalt éigin sa chosmas thug sé ardmholadh do Chomhairle na Cathrach agus don Institiúid Theicneolaíochta araon.

### **Mícheál Martin, TD**

Ní raibh a fhios agam go dtí gur tháinig mé ar maidin cé chomh nua-aimseartha is atá gach rud anseo agus an taighde atá ana-thábhachtach agus is é ionad taighde chomh maith é agus tá an Institiúid Theicneolaíochta i gCorcaigh páirteach anseo agus tá siad freagrach as bainistíocht an Ionaid\*\*.

### **Barraí Mescall**

Le linn na hoscailte inniu chomh maith taispeánadh pictiúr ón spás-stáisiún idirnáisiúnta i Meiriceá Thuaidh agus don spás-árthach *Discovery*, ar bord an árthaigh faoi láthair tá Dan Tanney, fear atá pósta le Jane Egan a saolaíodh agus tógadh i ngiorracht scread asail don gcaisleán ina bhfuil an t-ionad anois lonnaithe.

Mar sin, an chéad ionad spáseolaíochta sa tír oscailte ina bhfuil taighde, taispeántais agus idirghníomhaíocht ar na háiseanna éagsúla ar fáil ann. Is fiú go mór cúpla uair a chloig a chaitheamh ann ar do shuaimhneas.

Barraí Mescall, Nuacht TG4, as Caisleán na Carraige Duibhe, Corcaigh.

\*a seoladh a deirtear

\*\*an t-ionad a deirtear